

Mál nr. 5

Ungmennafélag Hrunamanna gegn Ungmennafélagi Selfoss, knattspyrnudeild

Kæra Hrunamanna

Dómkröfur

Leikur spilaður aftur eða það sem Dómstóll KSÍ ákveður.

Málavextir

Leiktími leiks er 2x40 mínútur, en var þann 18.06.2004 á Selfossi 2x35 mín í 3. fl. karla milli Selfoss og UMFH.

Lagarök

Leiktími er 2x40 mín en var 2x35 mín í 3.fl. karla.

Röksemdir

Í reglugerð KSÍ segir til um að leikur í 3.fl. karla eigi að spilast í 2x40 mín, en var spilaður í 2x35 mín.

Sönnunargögn

Athuga það sem kemur fram í athugasemdum í leikskýrslu eftir leik sem fram fór á Selfossi þann 18. júní 2004. Hringt var í neyðarsíma KSÍ ca. 21.30, hefði getað hringt 10. mín fyrr. Heimir Gunnarsson hringdi fyrir UMFH.

Greinargerð UMF Selfoss

Í fyrsta lagi voru engar athugasemdir skráðar á leikskýrslu af hálfu dómara leiksins. Hafi þær verið gerðar af þeim sem kærir tel ég slíkt alvarlegan gjörning. Leikurinn fór að settum leikreglum KSÍ og engar athugasemdir gerðar fyrr en að leik loknum. Þá taldi þjálfari UMFH að eitthvað hefði farið úrskaiðis varðandi leiktímann og þá væntanlega í seinni hálfleik þar sem engar athugasemdir komu fram í leikhléi. Ég ítreka það sem ég sagði áður að leikurinn fór fram eftir settum reglum KSÍ. Framkoma þjálfara UMFH eftir leik í garð dómara var hins vegar með ólíkindum þar sem hann reyndi að koma í veg fyrir að ég yfirgæfi leikvanginn með því að halda í bílhurð mína er ég hugðist halda til míns heima og spurning hvort dómstóllinn kæmi þeim skilaboðum til viðkomandi að framkoma af þessu tagi sé með öllu óviðunandi ef ekki ámælisverð.

Virðingarfyllst

Páll Leó Jónsson

Úrskurður Dómstóls KSÍ

Ár 2004, fimmtudaginn 1. júlí er dómþing Knattspyrnudómstóls KSÍ háð af Halldóri Halldórssyni. Fyrir er tekið mál nr. 5/2004, Ungmennafélag Hrunamanna gegn Ungmennafélagi Selfoss, knattspyrnudeild. Í málinu er kveðinn upp svofelldur dómur.

I.

Mál þetta er mótttekið af skrifstofu KSÍ 24. júní sl. Kærandi er Ungmennafélag Hrunamanna, Vesturbrún 4, Flúðum. Kærði er Ungmennafélagið Selfoss, knattspyrnudeild, Selfossi.

Málinu var úthlutað undirrituðum dómara í dómstól KSÍ þann 29. júní sl.

Dómkröfur kæranda.

Kærandi krefst þess að leikur milli aðila málsins í Íslandsmóti 3. flokks karla sem fram fór 19. júní sl. verði leikinn að nýju.

Kærði hefur ekki látið málið til sín taka.

II.

Kærandi lýsir málavöxtum á þá leið að nefndur leikur sem fram fór á milli félaganna þann 19. júní sl. hafi verið styttri en ráð er fyrir gert. Hvor hálfleikur hafi einungis verið 35 mínútur en hafi átt að vera 40 mínútur. Sem rökstuðning fyrir kröfum sínum vísar kærandi til reglugerðar um knattspyrnumót þar sem fram kemur að leiktími í 3. flokki karla skuli vera 2x40 mínútur.

III. Niðurstaða.

Að tilstuðlan formanns Dómstóls KSÍ gaf skrifstofa sambandsins kærða kost á að skila greinargerð vegna málsins en það hefur hann ekki gert. Dómari leiksins skrifaði stuttar athugasemdir í tölvupósti til KSÍ og þar kom m.a. fram að leikurinn hafi ekki verið nema 2x35 mínútur að viðbættum uppbótartíma. Leikskýrsla ber ekki með sér að athugasemdir hafi verið gerðar meðan á leik stóð eða eftir leik. Í tölvupósti dómarsins er þess getið að af hálfu kæranda hafi sennilega verið gerðar athugasemdir í seinni hálfleik án þess að þeim sé þar nánar lýst.

Með vísan til þess sem að framan er rakið telst sannað að leikur liðanna hafi verið 10 mínútum of stuttur. Slíkt er í andstöðu við ákvæði greinar 3.9.4 í reglugerð KSÍ um knattspyrnumót, en þar er skýrt tekið fram að í 3. flokki karla 11 manna liðum skuli leiktími vera 2x40 mínútur. Atvik þetta er ekki þeirrar gerðar að dómari leiks eigi um það endanlega ákvörðun sbr. 5. gr. knattspyrnulaganna. Reglur um leiktíma er að finna í reglugerð KSÍ um knattspyrnumót og þar dómara leiksins að sjá til þess að leikurinn stæði í þann tíma sem ákveðið er í reglugerð en það gerði hann ekki. Verður því ekki hjá því komist að taka kröfu kæranda til greina og dæma leik liðanna sem fram fór 19. júní sl. ógildan og mæla fyrir um að hann skuli leikinn að nýju. Halldór Halldórsson dómari í Knattspyrnudómstól KSÍ kveður upp dóm þennan.

Dómsorð

Leikur Ungmennafélags Hrunamanna og Ungmennafélagsins Selfoss í 3. fl karla sem fram fór 19. júní sl. skal endurtekinn.

Halldór Halldórsson.

Um áfrýjun

Heimilt er að skjóta úrskurðinum til áfrýjunardómstóls KSÍ, og er áfrýjunarfrestur til 5 daga frá því úrskurður dómstóls KSÍ var upp kveðinn og skulu almennir frídagar ekki taldir með.